

萬有文庫

第二集七百七種

王雲五主編

宋詩紀事

(一十)

厲鶚曰瑄輯

商務印書館發行

宋詩紀事

(一十)

屬鶚馬日瑄輯

國學基本叢書

萬有文庫

第二集七百種

總編纂者

王雲五

商務印書館發行

宋詩紀事卷六十九

歐良

良南城人官司戶劉後村序其詩

句

壁固君所奇鏡亦妾所惜乍可返君璧妾鏡不可得雜興紅黃冬樹葉紫翠夕陽山後村題跋

黃昇

昇字叔暘號玉林

胡季直云玉林蚤棄科舉雅意讀書閒從吟咏自適游受齋嘗稱其詩爲晴空冰柱樓秋房聞其與魏菊莊友善併以泉石清士目之

游金精山

在贛州寧都縣道書三十五福地漢女仙張麗英生有異質長沙王吳芮強委禽焉麗英乘雲空中語人曰吾金仙之精降治此山言訖冲天而去

曳履江城北逍遙訪仙鄉埽卻千里恨愛此六月涼雲根埋宿雨木末酣斜陽峭崖列品竇老樹攀穹蒼地坼三關暗天開一隙光青霄麗太白應此金之芒雙桃幾日熟冷笑癡吳王洞開人已去剛風舞霓裳

錢唐厲鶚輯
錢海寧陳晉錫勘定
汪沆

仙凡本相近。此理自可量。學詩未學仙。凡骨生慚惶。金精風月

吳汝式

汝式字伯成。盱江人。有雲臥詩集。

游石仙分韻得觀字

閑攏兩袖秋。步入冲寂觀。古樹老雲中。仙居毀巖半。是時零雨高。葉脫西風亂。怪禽走何忙。澀水流不漫。那知張郎仙。譎幻敢懸斷。雷書貯紅崖。愚下浪傳贊。符碑儻長靈。鬼物豈歌喚。尙云劒埋山。安得急推斷。冷翁亦張徒。精氣不如散。死坐豫樟空。鑿竅競窺看。何不葬山原。不然棄江汙。烏鳶與螻蟻。豈食吾一貫。獨流天地閒。萬古亘光燦。神仙固渺茫。此事良可惋。忍哉偷兒狂。更擣泥腹爛。我來擬少休。亭壓不敢玩。黃冠三四人。拙野只欲竄。延坐無好言。令我住涼館。飯餘且從觀。逸興薄霄漢。琴鳴著高彈。奔勝出奇算。嘯咏壺隱樓。撫事發長歎。大書同人名。聊欲記遊翫。陰霾淪輕寒。日色倏昏晏。倩人買村醪。煮芋疊肴案。清坐二更深。一睡各鼻鼾。曉來登巖頭。棘路解羈絆。劃開天蓋寬。遠景過飛翰。幽叢摘新查。窺險身發汗。居然束歸裝。重下西巖畔。我思古之人。豈只局窮閭。觀海登泰山。深高世閒冠。斯巖雖荒榛。樂事實昭煥。人心本然同。今古未容判。終當駕風雲。高蹈無畔岸。作詩示兒童。茲游吾豈憚。雲臥詩集

李顯卿

溪行

枯木扶疎夾道傍。野梅倒影浸寒塘。朝陽不到溪灣處。畱得橫橋一板霜。後村千家詩

陳天錫

絕句

舍南舍北雪猶存，山外斜陽不到門。
一夜冷香清入夢，野梅千樹月明村。
東臯雜錄

劉祖尹

祖尹，字怡堂，義烏人。

題石壁精舍

結廬投老瞰羣峯，隱隱松杉曲徑通。
剩種池邊千蘂竹，近營林下一巢風。
敲眠盡絕春來夢，趺坐閑看月墜空。
檢點吾生婚嫁了，子孫無事惱衰翁。
義烏縣志

劉仕龍

仕龍，字時甫，祖尹子，知廉州。

知廉州條上邊事落職，主管台州崇道觀賦感。

人生百年中，窮通無定跡。譬如風前花，榮謝亦頃刻。
當時牧牛豎，尊貴誰與敵。顛顛種瓜翁，乃是封侯客。
丈夫苟得時，糞土成拱壁。一朝恩寵衰，黃金失顏色。
古今諒皆然，我獨何歎息。
義烏縣志

曹旣明

過林和靖舊址

短棹不歸雙鶴去，一丘烟草寄山陰。
水邊疎影黃昏月，無限風騷在客心。

有懷湖山。題惠因院。

湖山平生鄰。松竹亦瓜葛。深期說情話。跬步成契闊。豈無朝夕思。或以塵累奪。何當淡相從。長年席不割。冷泉亭。

朱簷日轉軒窗上。碧嶂雲低草樹香。山影倒沈波底月。夜闌相對瀉寒光。

與同舍待浴靈芝寺中

一雨洗秋色。湖山增眼明。翻翻水中荷。作此淒涼聲。我輩本憔悴。客飯千里程。願言滌塵土。冠蓋臨華京。夜宿浙江亭。

夜半潮聲撼客牀。臥聽柔櫓鬧空江。驚迴倦枕鄉關夢。海日烘山上曉窗。以上咸淳臨安志

吳玠

龍興寺 在昌化縣千頃山

松檜陰中六月清。異花靈草不知名。客從瓊液山頭過。人在水晶宮上行。千尺翠嵐分月色。一軒寒籟動秋聲。登臨不厭躋攀峻。貪看雲從鳥下生。

梵安院 在昌化縣石筍山

山腰小徑細如繩。山鳥關關喜弄晴。黃菊有情留客醉。白雲無事伴人行。野流合處堪分字。草藥枯來欲問名。回首渡頭詩思逸。漁舟一笛晚風清。以上咸淳臨安志

黃文雷

文雷字希聲。盱江人有看雲小集。

晚立

獨游得荒蹊。晚意與心會。水聲遠纔聞。山色靜可對。鳥語林塘邊。犬吠籬落外。柴門未須關。月在東峯背。

西域圖

大哉天地閒。品類不可齊。誰爲好事人。貌此縣度西。松花瑣碎沙草肥。是閒可牧羊千蹄。可憐羣鹿正走險。或爾剝割衣其皮。啜渾樹樺尙有理。穴顙插齒吁何爲。吾聞中原全盛時。重譯四走朝京師。懷方象胥飭乃事。幻人詭伎何能奇。還君此畫雙涕洟。願賦周官王會詩。

二橋圖

翔龍下卷江東土。孫郎初得橋家女。橋家本是重曹瞞。隻雞斗酒空酸楚。衿情正用畱阿瑜。尙得人前稱肺腑。百年王氣竟銷沈。妙寫丹青嬌欲語。香閨搗管記何書。並蒂芙蓉按花譜。那知不是未嫁時。本末無從勘彤史。詞人多事管閑愁。銅雀紛紛底歌舞。儘強被髮向黃壚。只與東阿傳洛浦。

昭君行并序

白石季倫始賦昭君曲。以後作者寢多。不容措手。每恨沿襲之誤。作漢初和親意著詠。非也。又按竟寧元年。呼韓邪旣壻漢氏。其年五月宮車晏駕矣。因併著之。不惟祛詞人之失。亦以解昭君於地下云。

君不見未央前殿羅九賓。漢皇南面呼韓臣。無人作歌繼大雅。至今遺恨悲昭君。內殿春閑鬪馮傅。掖庭新花隔烟霧。嫋姚枉奪燕支山。玉顏竟上氈車去。人生流落那得知。不應畫史嫌蛾眉。癡心只恐琵琶語。

歸夢空隨鴻雁飛。穹廬隨分薄梳洗。世閒禍福還相倚。上流厭人能幾時。後來燕啄皇孫死。野狐落中高臺傾。宮人斜邊曲時平。千秋萬歲總如此。誰似青冢年年青。

往年因讀岳王傳。嘗爲之賦。今過東林。睹其遺像。感而申頌之。

欲壞長城豈自由。江人重唱白符鳩。熏天富貴還須盡。從古忠良類若讎。獄吏但能書牘背。相公終欲割鴻溝。書生志念閑無用。長想朱雲地下遊。

冬郊

冬郊見初晴。空林夕陽暝。歸牛無人驅。欲涉行轉緩。新臺明屋山。失喜雀爭喚。絕勝門外人。流冗及歲亂。以上看雲小集

胡仲參

仲參字希道。清源人。有竹莊小橐。

晚雨

勃姑鷗舅叫樓西。春色陰晴景不齊。濃墨四垂收不起。明邊一片夕陽低。

雪晴泛湖

雪後湖清淺。令人心眼開。林疎知寺近。冰合礙舟回。寒色欺吟鬢。斜陽入酒杯。山行已清絕。況復是尋梅。

過永春縣

距城纔百里。世路便難平。碣石唐人墓。桃源晉地名。危巖依嶽勢。荒市帶溪聲。往日罹兵火。頽垣蔓草生。

寒夜作

生計尚茫茫。微吟思故鄉。羈愁消不盡。寒夜未爲長。門掩梅花月。禽翻竹葉霜。挑燈裁錦字。明發有歸航。

和伯氏春雨中韻

兩隄楊柳拂新亭。怪底遊人嬾踏青。手撚梨花成小立。半窗湖水雨冥冥。以上竹莊小乘

陳伯山

伯山號東湖寓客。

同廖繼道游洞霄

勝日事幽尋。秉輿從所適。西風飄杖屨。偶作洞霄客。穿雲渡澗岡。捫蘿轉空碧。七人今何在。九鎖峯巒密。黃冠喜我輩。傾懷論宿昔。汲泉煮山苗。異氣穿几席。區區名利人。到此塵機息。洞霄詩集

程以南

以南理宗朝官祕閣校理。

茗溪晚泊

一笑茗溪上。微茫駐日曛。鷺沙行个字。魚浪出圓紋。晚色三家市。秋容幾樹雲。行藏知有分。莫誦北山文。

湖州府志

杜東

東字晦之。號月渚。

綠珠

以色列身豈不知。甘心死別不生離。樓前甲士紛如雪。正是花飛玉碎時。

平山堂

平山堂下水雲重。孤笛淒涼淡月中。不見龍蛇飛素壁。只餘狐兔戍離宮。仙翁已去風流盡。世事俱隨夢
幻空廣武無人同此意。慨然止有淚臨風。
以上詩家鼎鑪

何宋英

題六和塔下秀江亭

吳國山迎越國山。江流吳越兩山閒。兩山相對各無語。江自奔波山自閑。風帆烟棹知多少。東去西來何
日了。江湖淘盡古今人。只有青山長不老。
咸淳臨安志

薛師魯

師魯鄞人官郡判

苦雪

六出夫何甚。經旬散野堂。喜心翻作厭。瑞物恐爲殃。歲晚思薪火。天寒望太陽。荒村風雪裏。賴有隔年糧。
甬上耆舊集

陳俞

雨後過瑪瑙寺

借屋傍精廬。無事數來往。披草通泉流。刻樹記筍長。微風四山落。小立領松響。詎名息諸緣。暫喜脫塵網。
咸淳臨安志

潘中父

題釣臺

焚阮禍作逃園綺。明哲保身寧餓死。溺冠漫罵又一秦。織畚鼓刀恬不恥。子房託疾封畱歸。齊魯大臣那可比。此意寥寥二百載。阿諛往往居帝師。中興天幸有光武。下士謙恭冠千古。布衣本以道義交。不問故人登九五。竭來過我路幾程。征衫猶作戰血腥。睡餘伸腳稍加腹。安得細事關天星。歸歟宜審苞桑戒。勿念潔身增感慨。君持□□理乾坤。我把絲綸老湍瀨。
釣臺集

李時

途中遇雪

天寒鴉欲棲。客路尙遲遲。泥滑寒驢澀。風斜破帽敝。雲藏山斷絕。梅苦雪禁持。客裏愁無著。愁邊卻有詩。
後村千家詩

吳季先

季先臨川人

遊梅壇有感

小立仙壇挹斗箕。著身高處覺天低。南昌吏隱清風在。喚醒時人一枕迷。
梅仙事實

陳亦梅

梅花

江郊車馬滿斜輝。爭赴城南未掩扉。要識梅花無盡藏。人人襟袖帶香歸。全芳備祖

聞人祥正

宮詞集句

春風院落落花堆。花氣濃熏入酒杯。日午殿頭宣索鱸。小舟撐出柳陰來。王建 鄭獬 花藥夫人 徐師川
珠簾約住牡丹風。金殿香銷翠綺櫳。應作巫陽春夢句。日高猶睡綠窗中。宋景文 李商隱 晏叔原 白居易
珠箔輕明拂玉墀。漢宮仙掌露淋漓。金釵墜髻分行立。等候官家未出時。李商隱 文潞公 歐陽公 花藥夫人
學畫蛾眉獨出羣。越羅巴錦不勝春。承恩數上南薰殿。無奈宮中妒殺人。潘閔 張曙 杜甫 李白 後村千家詩

黃祖潤

祖潤官戶曹有和劉潛夫百梅絕句。

梅花

天籟消沈斗柄斜。繞枝忽起護巢鴉。素娥青女新梳洗。來鬪寒梅半夜花。
林閒翠羽啄枯槎。邂逅孤筇次水涯。飛過小溪畱數語。殷勤報有隔橋花。後村題跋

黃鑄

鑄字亦顏號乙山。日盤按絕妙好詞作晞顏

贊見洪帥

風烟入暝少人行。獨鶴來依帝子城。華表柱頭霜月冷。□□清夢到鐘聲。詩家鼎鑪

趙愚齋

客中清明

紅塵烏帽寄他鄉。欲語春愁怕斷腸。惆悵清明歸未得。借人門戶插垂楊。梅磻詩話

陳琰

琰字粲山。

題二陸祠

塵暗香殘二俊祠。可憐詞藻妙當時。聯鑣入洛成何事。一段淒涼鶴不知。梅磻詩話

郭君舉

天聰洞

混沌何年鑿。天聰亦強名。我疑龍窟宅。人說鬼經營。梯向巖邊接。雲從洞裏生。此行頑健甚。腳力十分輕。雁山志

龔桂馨

題桃花源

碧樹花開醉晚春。靈槎幾度汎天津。可憐太守仙緣薄。不是衣冠不屬秦。桃花源集

金子潛

子潛、休寧人。潭州司戶。

雲巖

丹崖何突兀。與客共躋攀。一嘯九天闊。斷雲千古閑。杖行龍虎背。袖拂斗牛閒。願言覓刀圭。乘風弄羽翰。
齊雲山志

王月浦

荷花

雨餘無事倚闌干。媚水荷花粉未乾。十萬瓊珠天不惜。綠盤擎出與人看。

瓊花

落瑩觀裏瓊花樹。天地中間第一花。此種從何探源委。東風無處著繁華。千鬚簇蜨團清馥。九萼聯珠異衆葩。幾見朱衣和露翦。金瓶先進帝王家。以上全芳備祖

程元岳

元岳、字申甫。歙人。理宗朝。官工部侍郎。

雲巖

直上雲巖絕頂峯。始知塵世有仙蹤。懸崖蘚潤經年雨。滿地花飄昨夜風。日月往來蒼翠杪。烟霞舒卷畫

圖中瑤臺禮罷笙簫歇。萬壑松聲自羽宮。齊雲山志

薛師石

師石字景石永嘉人有瓜廬詩

東閣趙汝回序云瓜廬翁每與四靈聚吟獨主
古淡融狹爲廣夷澁無素神悟意到自然清空
荆山劉植跋云瓜廬耕釣于會昌湖上多肥遯
之辭舒性情之正得象外之趣酌繩尺之嚴

瓜廬

近來有新趣。買得薛能園。疎壤延瓜蔓。深鋤去草根。花前長載酒。月下只開門。最識田家樂。辛勤更不言。

漁父詞

鄰家船上小姑兒。相問如何是別離。雙墜髻。一彎眉。愛看紅鱗比目魚。春融水暖百花開。獨棹扁舟過釣臺。鷗與鷺。莫相猜。不是逃名不肯來。

題南塘薛圃

門對南塘水亂流。竹根橘柢自成洲。中間老子隱名姓。只聽漁歌今白頭。

送葉宰赴豐城

君往爲官處。江西寇已平。獄閑空劒氣。堂靜響琴聲。有法催常稅。無私得衆情。時方急賢路。名定達公卿。

大龍湫

昔聞天下士。衡嶽稱崇正。又聞天下水。江漢爲巨流。古有山海經。歷歷敍九州。李唐三百載。詩書無一畱。及觀鄜道元。此地亦不收。不知諾矩那。何事能窮搜。我來元妙境。萬丈懸清湫。石壁去無極。百里彌道周。雲氣冒羣岫。龍宮深以幽。輕輿巖壑底。竟日涉溪游。陰晴異瞻矚。遠近難搜攷。飄如飛素練。粲若散琳瑯。風掀一潭雨。佛坐四時秋。喧呼勢益驟。洶湧聲彌遒。變化有如此。溥博誰與儔。吾謂神龍力。豈繫人鬼謀。稽首荷元遇。久坐勞雙眸。一杯卻嵐暑。旋步轟雷稠。以無澹世慮。欵起杞人憂。何當騎天狼。滿引射斗牛。
以上瓜廬詩

句

半洞容千佛。諸峯共一雲。游雁山 泉涌龍頻躍。山靈鳥不來。
石橋 瓜廬詩王汝跋

李炎子

炎子號竹溪。

定王臺

長安釐土築高臺。帝子規模亦壯哉。世事幾經羊胛熟。邊愁多趁鴈聲來。城頭煙樹旌旗合。柳外雲山水黑開。萬里乾坤歸老眼。不堪西望正風埃。
詩林萬選

徐寶之

寶之。理宗時貢士。